



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : f Tir Yimyim

Instagram tiryimyim@aolima

YouTube tir yimyim

TAPAK 8

India-i ayongzükba SCO senden nung China Tir Xi Jinping adentsü

Neeraj Chopra-i tanabuba Diamond League kokogo



VOL. XX NO. 259 (ADOK 259) DIMAPUR AMUNGNÜ (SUNDAY)

CHITENI (JULY) 02, 2023

₹ 5.00

December 2023 tashi nung Foothill Road renemtsü

Dimapur, July 1, 2023 (TYO): NFHRCC kettangpurtem aser den PWD(R&B) Divisional kettangsürtemi June 27 & 28, 2023 anogotem Foothill Road yangluba repranga senzüogo aser December 2023 tashi nung iba lenmang renemtsü akok ta ajitetba osang lemsatopogo.

Foothill Road maparen DPRs specification nung aliba ama inyakdar. Naganimora Division nung mapa 100% renemogo, Tuli Division nung 75-85%, Longleng Division nung 100% aser Mangkolemba Division nung 75% renemogo aser December 2023 tashi nung tanüngba maparen tembangtsü imlar, ta NFHRCC-i sangdong ka nung metetdaksü.

NFHRCC aser PWD(R&B) Divisional kettangsürtemi Anaki-C, Tuli aser Yajang- C nung public sendentem amen.

Iba mapang Anaki area aser Yajang Area nungi Village Councils Forum, Tsudikong (Tuli) Joint Councils Forum aser Langpangkong Road Construction Committee nungi teshimtet nübotem aden.

Foothills Road nung lenmang talangtibaji Baghty Division nung kilometer 89-92 tashi lir aser July ita hopta tanabuba tashi nung mapa tenzüksü ta NFHRCC-i sangdong nung ashi.

Iba mapa nung NFHRCC Supu Jamir-i anir kettangpurtem, PWD(R&B) Divisional kettangsürtem aser M/S Humtsoe Construction Ltd (Naganimora Division), M/S W. Chingkam Phom (Tuli Division), M/S R.K. Construction (Longleng Division) o M/S H.H Co. Construction & Supplier (Mangkolemba Division) nungertem aden.

Manipur kübok tesem aika nung lungkak ait

Imphal, July 1, 2023 (Agencies): Manipur kübok Imphal Valley nung Honibarnü nisungtemi tesem aika nung National Register of Citizens (NRC) mapa tenzüksüba aser tensa timi süngjemdang ta takhangba agüja lungkak aitogo.

Imphal East district kübok Khurai nung tetsür aika adenshia Manipur nung President's Rule benoktsü memulunger aser Chief Minister Biren N Singh pusema nungiter ta shia lungkak ait.

Assam kübok Cachar district den arrtsüa aliba Jiribam district nunga tetsürtemi chief minister aser MLA tem dang menden metoktsütsü tayongzükba agüja

lungkak ait. Parnoki menden toktsüra ibaji telungpur tsüngdang tila akümba ama asütsü ta tetsürtemi ashi.

Biren N Singh-i chief minister menden nungi manentsü ta ashiba sülen anogo ka lir tanü tesem balala nung lungkak aitba sentongtem ayonga agiogo.

Külen, Manipur nung Meitei nunger telok Coordinating Committee on Manipur Integrity (COCOMI)-ia President's Rule magizükba osang metetdaksüogo.

Parnoki Manipur Chief Minister N Biren Singh dang President's Rule magizüksü aser sorkar ajanga ken o tem angatetteptsüla ta ashi.

Union Health Minister-i vector-borne diseases nungi kümdanga alitsü metetdaksü

New Delhi, July 1, 2023(Agencies): Union Health Minister Mansukh Mandaviya-i tzüngluruwa aruba atema state ajak dang malaria, dengue aser chikungunya amala vector-borne diseases azüoktsü renema atatsü metetdaksüogo.

Paisa state sorkartem dang item amala tashidak nungi jenbua alitsü aser azüoktsü indang osang prokshitsü metetdaksü.

"Mapang jelia item tashidak atema renema atatsüla. State sorkartem health infrastructure nung senotsü amshitsüla aser tashidak noktangsüsa mapa inyakba ajanga khuret tulu nungi jenbur" ta Health Minister Mandaviya-i ashi.

Paisa state sorkartem dang item tashidak atema Ayushman Bharat- Health and Wellness Centres teyari agitsü aser IEC/ social mobilisation campaign

ajanga nübotem nem shilem agidaksütsü metetdaksü.

June 25, 2023 tashi nung Kerala nung dengue 18%, Tamil Nadu 17%, Arunachal Pradesh 13%, Karnataka 12% aser Maharashtra 10% putetba osang senden nung lemsatop.

Kerala nung dengue ajanga nisung 10 asü aser Gujarat o Maharashtra nung kaka süogo.

Kasa mapang, Karnataka nung chikungunya 39%, Maharashtra 20%, Gujarat 17% aser Puducherry 10% putetogo. Ajisüaka tang tashi nung iba tashidak ajanga nisung asüba osang mali.

2022 küm Japanese Encephalitis (JE) teimtiba putetbaji Assam, Uttar Pradesh, Jharkhand, Manipur, Meghalaya, West Bengal, Tamil Nadu, Odisha, Karnataka, Bihar aser Chhattisgarh nung liasü ta senden nungsa metetdaksü.

IIM Shillong aser Nagaland sorkar tsüngda MoU nung sign sütepogo



Dimapur, July 1, 2023 (TYO): Nagaland nungi kaketshirtem nem high-quality education agütsütsü atema Indian Institute of Management (IIM) Shillong (Dr. Kalam Centre) aser Nagaland sorkar tsüngda Memorandum of Understanding (MoU) ka nung sign sütepogo.

"IIM Shillong lisopurtem nüngdakba atema kishi lapoktsür aser North East nung lanurtem tashi itdaksütsü alizüing ayur" ta sangdong ka nung metetdaksü.

Iba sentong nung Nagaland higher education minister Temjen Imna Along-i IIM Shillong nem tenüngsang agütsü aser iba tenangzüktep ajanga Nagaland nung higher education maparen melenshitsu ta ashi.

"Iba tesentaktep ya skilling, capacity building aser New

Education Policy (NEP) mapa inyakba nung temelenshi tajung angutsü atema ayur" ta Imna Along-i ashi.

National Education Policy (NEP 2020) ya mangdang tajung aliba policy ka lir aser education system nung mapa tajung ka lir, ta paisa ashi.

"IIM Shillong-i North East region nung kaketshirtem atema bendanga agüja inyaker. North East kaketshirtemi Post Graduate Program (PGP) azüingba dang masü saka reju ajanga course balala agiba azüingtsü ayongzükter" ta Member of Board of Governors, IIM Shillong, Atul Kulkarni-i ashi.

"North East nung teinyaktsü aika lir aser IIM Shillong-i state ajunga tonga inyaktsü. IIMS indang Community Immersion

Program (CIP) ajanga Northeast nung nüngdabatem aser tebilemstütem atema inyaktsü" ta IIM Shillong director DP Goyal-ia ashi.

IIM Shillong aser Nagaland sorkar tsüngda MoU sign sütepba nung Tourism & Higher Education Government of Nagaland Minister Temjen Imna Along, Secy Tourism Nchumbemo Lotha, Addl. Secy Higher & Technical Education Sentiyanger aser Director Higher Education Dr. Nshoga Rengma nunger aden.

IIM Shillong tenüing nung Director IIM Shillong Prof. D.P. Goyal, Member BoG IIM Shillong Atul Kulkarni, Member BoG Nitin Sharma aser IIM Shillong Dr. Sanjeev Ningombam nungertem aden.

Assam nung lisopurtemi draft delimitation magizüker

Guwahati, July 1, 2023 (Agencies): Assam nung lisopurtemi tawa tasen tentetba Tribal People's Confederation, Assam (TPCA)-i draft delimitation magizükba metetdaksüogo.

Election Commission of India (ECI)-i sayaba draft delimitation magizüker. Iba ajanga lisopurtem lendongi aitsü aser lisopurtem masürtemi ang yimtenren, rongsenketzüng aser lokti wadang balala nung tongti shilem agitsü ta TPCA-i metetdaksü.

Hokolbarnü Guwahati nung aliba Designated Dharma Ground nung TPCA züngsem 100 tema adenshir lungkak ait. Parnoki Assam nung lisopurtem den asüngdangtepa constituency delimitation asütsü takhangba agütsü.

May 21 nü Sonapur nung lisopurtem indang state-level convention ka nung TPCA tenteta liasü. Iba mungdang nung lisopur activists, shisashirtem, tetsür aser lanurtem lennirtem aden.

Yashi lungkak aitba sentong nung taoba MP aser Bodo lennir Sansuma Khungur Bwisimthiary, taoba minister & ASDC lennir Holiram Terang, Bodo women activist Anjali Daimary aser tanga lennir aikati shilem agi.

June 20 nü ECI-i sayaba draft delimitation proposal nung lisopurtem nem assembly menden 19 aser Lok Sabha menden 2 (both hills and plains) lemzükja lir.

"Iba ya magizüker kechiyong

Sixth Schedule area Bodoland Territorial Region (BTR) nung unreserved constituencies lir. Iba ya Constitution alema lir" ta TPCA general secretary Bimal Amsi-i ashi.

BTR indang district 4 nungi assembly menden 14 nung Gossaingaon, Baokhungri, Parbatjhora, Bijni, Gobardhana, Goreswar, Bhergaon, Mazbat aser Tangla constituency tem STs nem lemzükba mali.

STs atema constituency 6-Udalguri, Tamulpur, Baksa, Kokrajhar, Dotma aser Sidli Chirang dang lemzükja lir.

"Sixth Schedule ajanga constituency 15 prong STs nem lemzükba sütsüla. Iba draft proposal ajanga Assembly nung non-tribal nisungtem dang amentsü" ta Amsi-i ashi.

"Külen, lisopurtem nem Kokrajhar Lok Sabha constituency lemzükja lir saka Darrang Lok Sabha bo melemzüksü. Udalguri district nung lisopurtem teimba ser aliba tesemtem atema Udalguri ta ser constituency tasen ka tentettsü onoki akhanger" ta paisa metetdaksü.

"District telemsa nung Dima Hasao aser West Karbi Anglong atema Lok Sabha constituency balaka alitsüla" ta paisa shisem.

"BTR aser Karbi Anglong nung lisopurtem atema menden 7 dang lemzükja lir, saka nütsüing yongsük reprangdangra BTR temalen aliba lisopurtem aser Karbi Anglong-Dima Hasao nütsüing yongsük

ama menden 8 lemzükba sütsüla" ta Amsi-isa ashi.

"Lakhimpur Lok Sabha menden nungi Majuli assembly segment agien aser Jorhat Lok Sabha menden nung dendaksü. Majuli ya lisopurtem teimba ser aliba constituency lir aser Lakhimpur Lok Sabha nung denra ST-reserved seat akümsü asüba agi agien" ta Amsi-isa metetdaksü.

"ECI ajanga adokba assembly aser parliamentary constituencies delimitation ya lisopurtemi aginüba ama masü. Iba ajanga lisopurtem lendongi aitsü aser tashimait akümsü" ta TPCA chief advisor & taoba MP Sansuma Khungur Bwisimthiary,

TPCA president aser taoba minister Holiram Terang aser general secretary Bimal Amsi nungeri sangdong ka nung metetdaksü.

"Iba jagi TPCA-i draft proposal magizüker aser lisopurtem den asüngdangtepa delimitation mapa inyaktsü takhangba agütsür" ta parnokisa ashi.

Assam Chief minister Himanta Biswa Sarma-i lisopur tesemtem nung Hindu Bengalis aser tanga non-indigenous people lidaksütsü ashiba magizüker ta TPCA-isa metetdaksü.

"Chief minister-i May 30 nü Bangladesh nungi Hindu Bengalis aser unprotected classes nungi nisungtemi BTR aser tribal belt & blocks nung alli alitetsü ta ashiba meyipa agitsü metetdaksür" ta TPCA-isa ashi.

Advisor Tongpang Ozukum-i K2K bike riders tem ajungshi



Kohima, Chiteni/July 1 (TYO): Nagaland Advisor for Water Resources, Tongpang Ozukum-i Honibarnü, 2 Naga Regiment-i bike expedition ka ayongzüka agiba atema parnok nem tenüngsang agüja liasü.

1999 Kargil War mapang Naga army officer Capt Neikezhakuo Kenguruse aser tanga sepaitemi kanga tasüita raraba aser pei taküm bendanga agütsü indang osang prokshitsü atema iba bike expedition ya ayongzüokogo.

Honibarnü World War-II Cemetery nung Kargil Victory Ride Kohima to Kargil (K2K) sentong nung o jembiba mapang Ozukum-i, state yimtiba Kohima nungi tenzüka state teku aser Union Territories ana ajanger July 26 nü Kargil Vijay Diwas amungba nü Kargil nung sentong tembangtsü asoshi bike expedition ka ayongzüka atema kanga pelaba lemsatapa liasü.

"Naga nunger aser Kargil

war nung Naga nungertemi taküm bendanga agütsüba indang lemsateptsü asoshi iba sentong ya kanga junga yangluogo," ta pai ashi.

Paisa, sepaitem ama parnok tazüokba nung lir ta ashiba den linük kümzüka ayutsü atema parnoki pei taküm bendanga agütsüba aososhi parnok nem tenüngsang agüja liasü. Nagaland sorkar tenüng nung Ozukum-isa, iba expedition ya takok nung agitettsü imlaja ataba lemsatepba den Naga nunger mapa ka nungbo mangko bushirtem liasü saka tangbo mangko bushirtem masü aser Indian Army nung tanga sepaitem ama tasü tait sepaitem lir ta osang shidak pokshitsü atema ayongzüka liasü.

Pai, Kargil rara nung taküm bendanga agütsüba sepai kinungertem dang Naga nungertemi parnok nem aküm tetushi agütsüba lemsatepba metetdaksü.

Kasa mapang nung

Commanding Officer 2 Naga Regiment Col S. S. Gusaini ashiba agi, iba expedition ya, 1999 Kargil rara nung Naga nunger sepai Captain Kenguruse-i pa taküm bendanga agütsüba nungdem nung ayongzüka lir ta ashiba den tetsü tasoli asoshi taküm bendanga agütsüba sepai nem aküm tetushi agütsüba dang nungi tuluba mali ta ashi.

2nd Naga Regiment, 2IC Lt. Col Saini-i anir bike 12 nung nisung 24 mener July 2 nü iba expedition tenzüksü. Iba sentong ya GOC-in-C, Eastern Command, Lt Gen RP Kalita-i tenzüksütsü.

Indian Army (2nd Battalion, the Naga Regiment, the Mashkoh Warriors)-i Kargil rara tembangba sülen küm 25 ajungba küm rara nung taküm bendanga agütsüba tasü tait Naga nunger sepaitem nem tetushi agütsütsü atema Kohima nungi Kargil tashi Motorcycle Expedition ka ayongzüka agir.

Wokha nung ozüng raksar ka apu

Dimapur, Chiteni/July 1 (TYO): Court of Judicial Magistrate First Class, Wokha, Julian Sitlhou, NJS-i, ken o balala nung aija alisang Abenthung Kiko, Section 385 IPC kübok rakzükrakdemtsü merangba atema tepuokdak küm ka, section 427 IPC kübok ozüng raksaba atema tepuokdak ita trok aser section 506 (I) IPC kübok tangar amokmerenba atema tepuokdak ita trok ayutsü asoshi obendang agütsüogo. Temalen shisema aliba obendang ya mapa ka nung dang benoka inyaksangshitsü.

Aija alisang ya rakzükrakdemba, amokmerenba aser ozüng raksaba atema aitsüogo. Pai passenger taxi (Sumo) ka tashiyim agi sota passenger tem nem timtem agütsü aser iba den gari anisang dang sen meshia pa

amokmerenba den sumo gari indang windshield dena raksaja liasü.

Iba ken o ya ASI Zubemo Ovung-i kanga takok ngua bushisüngdangogo aser Assistant Public Prosecutor, Wokha K. RempemTungoe-i prosecute süa liasü. Obendang agütsüba mapang Magistrate-i rakzükrakdem ajaklen kanga buluba temulung dang yur aija alir nem tapet temerenshi magütsüra pai tanaben iba amala ozüng raksaba maparen inyaksü asoshi matidaksü, ta ashi.

Judicial Magistrate First Class, Wokha Julian Sitlhou, NJS-isa, ozüng raksartem sentong raksaja lokti kümzüka ayutsüji temzüng ozüng indang nükjidong tongtibangtiba ka lir, koba temerenshi tapet agütsüba ajanga ajangzüktetsü, ta ashi.

Peren district nung skill training ayongzüka agütsü

Dimapur, Chiteni/July 1 (TYO): Microsoft philanthropies den longjemer Peren district Administration aser District Skills Committee-i Microsoft Diversity skilling programme dak sendakba nung district nung aliba tetsür aser lanurtem atema skill training agütsütsü sentong lir.

Training nung Digital productivity, Employability skills, Communication Skills aser Entrepreneurial skills amala modules tem alitsü.

Deputy Commissioner Peren Vineet Kumar IAS-isa, training takok ngua agiba sülen candidate tem ajak nem Microsoft-i kuli kakat agütsütsü, ta metetdaksü. Iba training sentong ya professional training agütsütsü nükjidong nung ayongzüokogo. DC-isa, training tembangba sülen shilem agitem nem mapa asoshi lenmang

lapoktsütsü ta ashi.

Training nung arishi küm 16 nungi 35 tsüngda alirtemi shilem agitettsü aser training course ya curriculum apir ghonda 40 nungi 140 tashi asütsü.

Maneni Peren DC-isa, training agütsüba tesem mapang tatong nung metetdaksütsü aser application agütsütsü asoshi tatembangbuba anogoji July 15 nü asütsü ta metetdaksüogo.

Applicants temi application ya online mesüra offline ajanga agütsütsütsü. Anungji iba training sentong nung shilem agütsü jangrartemi application ya Email: dcperen.ngl@nic.in ajanga yoktettsü, mesüra administration office ansatiba nung agütsütsütsü. Osang tejangjaba agütsü atema iba number; 7736793893 nung tongteprateptsü asoshi DC-isa metetdaksüogo.

LFI Annual Freshers' Meet 2023 agiogo



Dimapur, Chiteni/July 1 (TYO): Livingstone Foundation International-i July 1 nü Annual Freshers' Meet 2023 ayongzüka agiogo. Iba sentong ya LFI Auditorium nung 11 ako nungi tenzüka agia liasü.

Annual Freshers' Meet sentong ya Kevi Mere, Kakupu Achumi, Pakichunwiliu Newmai aser Kriti Dubey nunger lenisüba nung agi aser kaketshirtemi sentong balala nung shilem agia liasü.

Sentong ya LFI Chaplain Zhimoholi Zhimomi-i sarasademer tenük aser Grade-XII kaketshirtem tenüng nung Henjoy Ham-i lokti pela agizüba o jembiba liasü. Iba sülen Dr. Andrew Ahoto Sema, Chairman LFI-i o tatsüka jembiba, kong pai taküm azüoka aser meraketa alitsü atema kaketshirtemi pei taküm nung yimya tajungtem bendenloksü nungdakba lemsatapa liasü. Paisa, Livingstone Foundation International nungi lenir tajung anitettsü atema nükjidong aliba

indang lemsatep den, school-i teti kaketshirtem lenla ajak nung renlok aotsü aser senso tajung kaka kümdaktsütsü asoshi tangazükba agütsütsü nükjidong yur inyakba indang lemsatapa liasü.

Iba sülen Mr. & Miss Fresher tetoktepba atema metetpelaba sentong agi kong Grade-XI nungi kaketshir tasentemi shilem agia liasü.

Sentong nungsa Grade-XII Arts kaketshirtemi Cross Dress Fashion Show ka ai aser iba ajanga sentong nung shilem agitem ajak pelatepdaksü aser ajaki pelashishia agizüka liasü.

Mr. & Miss Fresher tetoktepba Talent Round nung freshers temi parnok indang sempettem saya liasü. Tetoktepba asoshi tetendangertem rongnung Dr. Andrew Ahoto Sema, Chairman LFI, Ani Yephthomi, Director LFI, Vimeyieno Tsukru, Anna Zimo, Fresher 2022 aser Ongba M. Angto, Mr. Fresher 2022 nunger

densema liasü.

Final Questionnaire Round agiba sülen Grade-XI Science nungi Alice Konyak aser Grade-XI Commerce nungi Medotso Peseyie na nem Miss Fresher 2023 aser Mr. Fresher 2023 naroküm agüja liasü. Taküm Most Talented Fresher naroküm Grade-XI Science nungi Titus nem agütsü aser Most Popular Fresher naroküm Grade-XI Arts nungi Sam nem agüja liasü. Tetoktepba nung takok angurtem nem Director, Ani Yephthomi aser taoba küm Mr. & Miss Fresher nunger tetushi agüja liasü.

Maneni sentong nung Grade-XII Commerce puri 'Bollywood Dance' ta nungja agütsü tsüngsang ka saya aser LFI Boarders temi Remix Choreography ka saya liasü. Iba sentong ya Ani Yephthomi-i tepla o jembiba sülen tembang aser maneni photo session agi aser sentong nung shilem agir ajak nem refreshment agüja liasü.

Home Minister Amit Shah-i TIPRA Motha dang nangzük

Agartala, July 1, 2023 (Agencies): TIPRA Motha chairman Pradyot Kishore Maniky Debbarma-i anir TIPRA Motha teshimtet teloki Honibarnü New Delhi nung Union Home Minister Amit Shah den ajurutepogo.

Idangji Amit Shah-i constitutional solution ahangba ama inyaksü shiogo ta TIPRA Motha osang ajanga angazüker.

Chuba jabaso Pradyot den TIPRA Motha President Bijoy Kumar Hrangkhawl, Tripura Tribal Areas Autonomous District Council (TTAADC) Chief Executive Member Purna Chandra Jamatia, Tripura Legislative Assembly nung Leader of Opposition Animesh Debbarma aser tanga lennirtemi Union Minister Shah den ajurutep.

"Greater Tipraland atema constitutional solution ahangba ya tanü tasen masü aser Union Home Minister-ia

iba onük meteta lir" ta Pradyot-i ashi.

"Tanü onok senden amenbaji onok core demand atema liasü. Assembly election magidang aser agiba sülen Union Home Minister-i lemtet ka agütsü shiogo. Iba atema onok olemtepogo aser pai inyaksü nangzükogo" ta Pradyot-isa metetdaksü.

"Tesüba küm 70 tashi lisopurtem kanga timtema aruogo. Onok ali tashibo lisopurtem atema maneni inyaksü" ta paisa ashi.

"Tiprasa nunger temulung tip matemer. Parnoki tanga lemtet ka aginür saka teinyaktsü kar meinyaker. Iba ya Tipra Motha tsütsü nungi masü. India sorkari tekaraba nung mapa inyaksüla kechiyong khenkhenbo tensa mejungi akümer aser Tripura nung yamaji matalokdaksünür. Home Minister-i iba onük atema shisadangtsü aser tekaratiba nung langka ka inyaksü nangzükogo" ta Pradyot-isa ashi.

Maharashtra kubok Buldhana nung bus lendong nung nisung 25 asü



July 01, 2023 anepdang züngia Madhya Pradesh kubok Buldhana district nung bus toudak mapang mi adoka arongba lendong nung asür ka tasü mang bener aoba noksa nung angur. Iba lendong nung nisung 25 asü aser nisung 10 yiruogo.

Mumbai, July 01 (Agencies): Honibarnep züngia Maharashtra kubok Buldhana district nung bus toudak mapang mi adokba lendong nung tanur asem densema nisung 25 asü aser nisung 10 yiruogo, ta Honibarnü police-i metetdaksü.

Iba bus ji Pune-i aoba mapang nung bus jagi light indong ka nung atsükba sülen bus nung aliba diesel tank nung mi eploka liasü, ta police officer Baburao Mahamuni-i metetdaksü.

"Bus nungji nisung 30 dak tema mena liasü. Iba lendong nung nisung 25 asü aser nisung ter yiruogo. Bus anisang densema iba lendong nung yirurtenji anasa aliba hospital katia anir ao," ta paisa metetdaksü.

Lendong atalokba tesemji Mumbai nungi kilometer 400 shi pilar lir. Iba tatalokba sülen

police-i bushisingdang tenzükogo. "Tang rondak teinyaksü mapaji tasü mangtem maitsü jangjaba sülen par kinünger züngsemtem ket nung tasü mang agütsütsü," ta police superintendent Sunil Kadasane-i metetdaksü.

Ato kilonser, Narendra Modi-i twitter ajanga, "Buldhana nung bus lendong atalokba osang angashia jashir. Ni mangyimer kibongtem atema sarasademtsür aser yirua alirtem tekaraba nung aneptsü sarasademtsür," ta lemsatap.

Maharashtra Chief Minister Eknath Shinde-ia iba lendong nung takoksa angurtem atema mangyim jashi lemsatapba den külemi takoksa angur kibongtem nem senotsü teyari lakh 5 agütsütsü, ta sangdong.

Alima nung garitem shilem 1 dang India nung lir, ajisüiaka

küm shia alima nung gari lendong nung asüba shilem 11 bo India nung ataloker (World Bank report 2021).

Küm shia India nung gari 150,000 shi tsükoker aser minute 4 shia nisung kabosa gari lendong nung asür. India nung gari lendong ajanga küm shia India nung rongsenketzüng dollar sen billion 75 shi takoksa angur, kechiyong gari lendong nung yirua treatment agiba den income tsütsü tulu takoksa angur, aser nisung aika sensak tai yoker.

Taküm May ita nunga India nung bus ka apu nungi tsükokba lendong nung nisung 21 asü. Bus tanidak mapang amouzüka aoba ajanga iba lendong atalok.

Yaküm October ita nunga kiyir benjung kati aoter telok ka bus nung toudak mapang bus ji ayonglen tsükokba lendong nung nisung 31 asü.

India-i ayongzükba SCO senden nung China Tir Xi Jinping adentsü


Beijing, June 30 (Agencies): Taruba hopta India-i ayongzükba Shanghai Cooperation Organisation (SCO) senden nung China Tir, Xi Jinping adentsü, ta Hokolbarnü foreign ministry-i metetdaksü.

Foreign Ministry otongdar, Hua Chunying-i, "India Ato kilonser Narendra Modi-i jaokba nung ajemdaker July 4 nü China Tir, Xi Jinping-i Beijing

nungi video conference ajanga 23buba Shanghai Cooperation Organization (SCO) tekolakpurtem senden nung shilem agia adentsü aser tongtibang onük kar jembitsü," ta metetdaksü.

July 4 nü Ato kilonser Narendra Modi mendenbuba ser SCO züngsem linüktem nungi tekolakpurtem video conferencing ajanga senden amentsü.

Kasa senden nungji Turkmenistan tejaoker linük ama adentsü aser SCO tentet ana - Secretariat aser SCO RATS nungia ketdangsertem adentsü. Iba dak alia international aser regional organizations trok nungi tekolakpurtema iba senden nung adentsü jaokogo. Item organization ji UN, ASEAN, CIS, CSTO, EAEU aser CICA lir.



July 01, 2023 nü Shadhol district (Madhya Pradesh) nung Sickle Cell Anaemia Elimination Mission sentong nung Ato kilonser, Narendra Modi adenba noksa nung angur.

Onoki Uniform Civil Code indang 'draft' akhanger: Congress

New Delhi, July 01 (Agencies): July 3, 2023 nü Law Commission-i Uniform Civil Code (UCC) atema o lemteptsü lia Honibarnü Congress Parliamentary Strategy Group senden mena taruba Parliament nung benoktsü atema onük balala nung o lemtepogo.

UCC dak sendakba nung Congress party-i, onoki UCC atema 'draft' akhanger aser iba takhangba nungi onoki matsüngshir, ta metetdaksü.

Taoba mapang Congress Tir, Sonia Gandhi'er kidang senden amenba sülen Congress General Secretary, Jairam Ramesh-i, "Onoki June 15 nü agütsüba sangdong (UCC draft akhangba) nungi mainshir," ta metetdaksü.

Tang Manipur tensa dak sendakba nung Congress Parliamentary Strategy Group-i Manipur Chief Minister, N Biren Singh-i CM menden nungi anentsüla, ta metetdaksü.

Manipur nung rara tenzükba sülen tang tashi Ato kilonser

Narendra Modi-i iba onük nung ola kata madokba atema Congress-i maneni aitsür aser tasüngdangba akar.

"Tanü onoki onük balala nung o lemtepsü rongnung Manipur tensa atema tama jembia liasü. Onoki Chief Minister (N Biren Singh) menden nungi anentsü akhanger, kechiyong yangji BJP sorkari tensa mazüokteter. Onokisa Parliament nung Manipur tensa dak sendakba nung o lemteptsü akhanger," ta Jairam Ramesh-isa metetdaksü.

Congress-isa Balasore nung trian lendong tulu atalokba atema Railway minister Ashwini Vaishnaw-i menden nungi anentsüla akhanger, taruba tzüngluruwa mongpu senden nung iba onük-a onoki süoktsü, ta paisa metetdaksü.

Opposition party tem taruba senden Bengaluru nung July 13-14 anogotem nung amentsü, ta NCP Tir, Sharad Pawar-i sangdongba dak sendakba nung Jairam Ramesh-i, iba anogoji tesülen ang jangjatsü, ta metetdaksü.



July 01, 2023 nü Nagpur nung Union Minister, Nitin Gadkari aser Bollywood actor, Anupam Kher nati G H Raisoni Memorial Talk sentong nung shilem agiba noksa nung angur.

July 20 nungi tzüngluruwa mongpu Parliament senden tenzüktsü

New Delhi, July 01 (Agencies): July 20, 2023 nungi tenzükba tzüngluruwa mongpu Parliament senden tenzüktsü aser August 11 nü tembangtsü, ta Honibarnü Parliamentary Affairs Minister, Pralhad Joshi-i metetdaksü.

Iba osang metetdaksa paisa yimtenren party balala dang iba senden junga katettsü atema ajaki shilem tajung agidaksüner, ta mepishi.

Taruba senden nunga rongrong adoktsüa akok, kechiyong sangküm Lok Sabha elecion agitsü lia opposition party temi longjemer Parliament nung Narendra Modi-i aniba BJP sorkar anema nokdaksü tebilemba lir.

Iba dak alia Ato kilonser, Narendra Modi-i linük nung Uniform Civil Code (UCC) benoktsü atema jembiba mapang ka nung Parliament senden akatsü.

Taruba Parliament senden ya Parliament building tejenba nung ang tenzüktsüa akok, iba

sülen ang Parliament building tasenba nung agitsü, ta osang angazüker.

Parliament building tasenba ya taküm May 28 nü Ato kilonseri semzükja liasü.

Union Minister Joshi-i twitter ajanga, "Tzüngluruwa mongpu 2023, Parliament senden July 20 nü tenzüktsü aser August 11 tashi maneni agitsü. Party ajak dang onük balala nung o lemtepdang shilem tajung agitsü mepishir," ta metetdaksü.

Taruba senden ya anogo 23 tsüngda agitsü aser senden ajak senteper 17 alitsü, ta pai Hindi agi twitter ajangasa metetdaksü.

Iba senden nung sorkari Government of National Capital Territory of Delhi (Amendment) Ordinance melentsü atema bill ka benoktsü.

Kasa senden nungsa Union Cabinet-i agizükba National Research Foundation Bill benoktsü.



TIR YIMYIM YIMOBILEM (EDITORIAL)

DIMAPUR AMUNGNÜ, CHITENI(JULY) 02, 2023

Kija mapa masü

Asenok aikati Tsüngrem mapa inyaksü kanga jangrar, anungji aiben Tsüngrem yimli asoshi inyaksü jangraba agi mapa inyaker meinyakma nangzükdener aser chiyongtsü mapanga mangu inyaker. Atangji, Tsüngremer mapa nung anogo shia anü koma adoker aser koma aluar memeteti kanga mazüngi inyakba purtem jenti lir. Ajisüaka, asenoki khen Tsüngrem dang asenoki inyakba mapa ajak ya aseni inyaksü atema nungloksüba mapa asü masü ? Kechiba asen nembo asen tashi dak alaka inyaksü mapa lemsüksü (?) ta Pa mulungbaji angatetnua sarasadema inyaksübaji kanga tongtibang kumogo. Khristan taküm ka asoshi pei taküm nung Tsüngremi mulungba angatetsübaji dang masü saka Tsüngremi memulungba angatetsübaji kanga tongtibang lir. Ashiko, tanü asenoki Tsüngrem asoshi inyaker ta bilema mazüngi inyakba mapatem rongnung karbo Tsüngremi memulungba mesüra Tsüngremi asen nem nungloksüba mapa masüsüa akok. Iba amaji, kodang asenoki Tsüngremi mulungba dang masü saka memulungba dena mangatet ser inyakdir, asenibo tajunga ta bilema inyakdang tangar asoshi timtemang asüsüa akok. Israel nunger Egypt lima nungi pilali, parnok Sinai tenem anasa arem nung tanendak yanglur amongdang, parnok rongnung mangatettep aser meputeptsüsa maparen jenti atalok, anungji item mangatettep ken o ajakji yashi tashi Egypt nung alarsa aliba nübortemi Mosa dangi bener aru. Atangji, Israel nunger Egypt nung alar tia nung liaka, joko yimya sübadoker, parnoki parnoksa kecha alar tia nung alir ta memeteti jangratema lia aliba kolok dener aliba purtem tia aser jenjangji Mosai kanga junga angateta liasü. Ibayongji, pai parnok kanga meim aser parnoki ajuruba shisabolu khuret aser mangatettep ken o ajakji pa khuret bener pai anepdang nungi nikongdang tashi parnoki bener aruba ken o ji angadangli aser obendangtsüli ta asüba tatalokba otsü ka Anitet tapu 18 nung zülua angur. Israel nungertem Moasai anir Egypt lima toktsüdang parnok nütsüng ajak agi lakh metsü dak tali liasü ta ashir. Ibaji tanü asenok Nagaland nung Naga nunger nütsüngyongsük dang nungi teimba lir. Iba mapang Israel nunger nütsüngji Egypt nunger nütsüngyongsük dang nungia teimba liasü ta Laishirtemi sükdangtetter. Nisung paika denji ano parnok kiset shirurutem lir, anungji parnok nungdakji onsara nungji, aiben parnok ayaba aser tüzüba timtem ajuruba asenoki angur. Idangji, parnok kinungertem rongnung dena raratepba otsü kasa Laishiba tapu nung angur. Iba mapang tashi nung ano Israel nunger madak obendanger shima mali nungji, obendangtsüba mapa ajungaji Mosa mapa ama kümer liasü aser nisungtemia Mosai dang parnok taginüba ken o ji bendangtetsü ta bilem. Ajisüaka, kodaser nisung ka kisüngi nisung lakh metsü dak tali dak atalokba ken o bendangtetsü. Ibaji Mosa asoshi dang masü saka Israel nunger asoshi timtem tulu liasü. Iba timtemji Mosa tokoi angu aser tajunglen agi Mosa dang kechiba anogo piyong nabo amener aser nübortembo nokdakdaksür ta arütsüba asenoki Anitet 18 tekong 14 nung angur. Mosai pa ashi dak tali inyakba tokoi ajitet aser iba jagi tangar aika Tsüngrem tenzükba nung aser nübortem yariba nung shilem magitetsüsa kümdaktsü. Mosa ya Tsüngrem den indangindanga jembia Israel nungertem ken o bendangtsür ka liasü saka paia Tsüngremi mulungbabo mangatet aser nübortem madak mapa lemsar timi ketdangtsütsüba Tsüngremer shisatsüjibo magizükteti liasü, Paia toko Jethroi pa dang pa mapajibo tangari mebendangtetta ken o tasak kar bendangtsütsüba dak alaka ken o tila teritem bendangtsü atema nisung meyerijang, noklang, tenem aser ter madak Tsüngrem tsübuba pur, sübokrem sempar, ochishir aser mapa akoker shima bendangdakjang ta ashidang dang rajem aser iba kasa inyakyimji Tsüngrem dang asüngdanga inyak. Idangji dang Mosa khuret pongbaa aküm aser nisungtem dang Tsüngrem o sayua anitsü mapang peria angu. Asenoka Mosa amaji, mapabo tajung inyaker saka asen tashi dak alia inyaker ta bilema inyaka lira, Tsüngrem dang asüngdangdi aser khuretji maongka kümer Tsüngrem dang asüngdanga aseni temulung lemtetba purtem den lemsatepa inyakdi.

OLEMSABANG

TEMELENSHI ADOKDAKTSÜBA LENISÜBA: MOSA TAKÜM ASER LENISÜBA NUNGI TANGAZÜKTSÜ KAR

~ Temsüyanger, CTC (source:- Mitkar)

(Yashi adok nungi)

5. Tatitang Nung Tsüktsü Lendong Tekümdangtsü Nüburtem Dang Ajungshiba:

Kodang Mosa Sinai tenem nungi talangka malu, nübortemi Aron dang adenshia ashi, "Mosa shiba asenok Ijip lima nungi aniteta anir aru, pa kechi aküm onoki memetet; anungji asenok len anitsü asoshi tsüngrem ka yanglujang" (Ani. 32:1). Idangji Kibubai Mosa dang ashi, "Yakta meyipa luang, kechiaser ne nübör shirnok nai Ijip nungi anizüka anir aru; parnok raksa-a kumogo. Ni melaba lenmang nungi parnok meyipogo, parnoki hon agi nashi süngyanglu ka muluteta iba nemji tarongba tenla agüja külemdaki. Ibaji parnok tsüngremtem; shibai parnok Ijip lima nungi anir aru ta parnoki ashir. Ano Kibubai Mosa dang ashi, iba nübör tekong temerang ta ni ngugo. Anungji kü ain tulu parnok anema adoka parnok samatsütsü asoshi tang kü kija tokjang. Aser ni na agi kin tulu ka kümdaktsüdi" (Ani. 32:7-9). Kodang Aroni nübortem jabang mayimi kümdaktsüba ajanga tsükchirtemi sensatsüogo ta Mosai angu (Ani. 32:25), asüngji Mosai nübortem dang ashi, "Nenoki tetsübuttsüka temenen menaogo. Saka ni tang Kibuba dangi tua nenok asoshi temenen pungitsü atema ni pa dang mepishitsü" (Ani. 32:30).

Mosai nübortem temenen asoshi jembia aser parnok menen pungitsu asoshi Kibuba Tsüngrem dang mepishitsü nangzük; pai nübortem ajungshi, saka nübortemi taküm mesüra tasüba, temoatsü mesüra atakatem shimtsü asoshi ayongzük. Tashi angaba ajanga temoatsü, takokba, yimjung, azükaro aser yimjiyimjung, saka tashi mangaba ajanga tashitak, yawara, takoksa, alar tia, pei senmang samaba aser taküm temoatsütem ajunga samatsü indang ayongzük. Mosai talisa nübortem tamangba tai nung metsüktsü asoshi ajungshi. Moab lenden nung Mosai Israel nübortem dang tatemsa ashi, azüng akümtsübuba ajanga kija aser nübortem asoshi temoatsüba, saka aküm metsübuba ajanga tasüba. Kibuba nungi Mosa dang kechi aru ibaji nübortem dang sayu, tarutsü pututem aser nübortem akümtsübua alitsü asoshi ajungshi.

Mosai maneni ashi, tenangzükba lima tonger külen Israel nübortem Yihova Tsüngrem dak mamangba nübortem den alitsü Azükarua alitsü, jangratema alitsü asoshi senti mapang aika ajurutsü. Saka item ajunga jagi ano lendongtem bena arutsütsü ta pai tekümdangtsü ashi; par sobaliba aser tamangba samatsütsü, asüküm aser khonang nüngsang parnoki ajangzükba nung Tsüngrem par sentong nungi pilatsütsü lendong. Aji saka nübortemi Kibuba dak jenokra, par tesübatem jagi par lenmang shitak aser tarutsü lenmang shitak nung anitsü. Anungji Mosai ashir; "nai parnok metsübuttsüla, Ijip ajak nung Kibuba ne Tsüngremi Farao dak inyakba bilemtetang," "...Kibuba ne Tsüngremi item küm lir lisem lima nung na koda anishi ajak nai bilemtetsüla," "Lisem lima nung nai Kibuba ne Tsüngrem koda ain adokdaksü aji bilemtetang aser tamadok" (Tazüng. 7:18; 8:2; 9:7). "Aser tang, Oh Israel, Kibuba ne Tsüngremi ne dang nungi kechi akhanger? Saka Kibuba ne Tsüngrem tsübuttsü, pa lenmang ajak nung jajatsü, ne mulung ajak agi aser ne nela ajak agi pa dang meimtsü aser tenzüktsü, aser tanü ni nenok nem nenok ajungtsü asoshi agütsüba Kibuba ozüngtem aser pa temelabatem benshitsü" (Tazüng. 10:12-13).

Mosa Lenisübai Ajangzükba aser Pa Taküm Nung Tongtibang Lenisüba Kar

Mosai pa nübortem alar tia nung aliba angu, par nübortemi aginübatem pai meteta liasü, saka nübortem alar tia nungi anitetsü asoshi sentongjibo Tsüngremer sentong liasü. Tsüngremi Mosa nem lenisüba khuret nungloksü, aser aji ataloktsü asoshi Mosa dang Tsüngremer tenangzükba liasü. Mosa lenisüba ajanga par lokti taküm nung tongtibang temelenshi ana bena arutsüba: mezüngbuba nung, kin ter ana lungjema küma Israel kin aser par yimsüsüba yangertet; tanabuba nung, Ijip lima alar tia nungi par nübortem anitet (Ani. 3:16-18).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chuchuyimpang Arogo nung VBS agiogo



Chuchuyimpang Baptist Arogo Christian Education Ministry kübok tanurtem Vacation Bible School "Stellar Shine Jesus Light" ta asüba omen dak ajemdaker agidang tangokba noksa nung angur.

Mokokchung, Aami/July 01 (TYO): Tanurtem mei sodi mapang nung Tsüngrem O angazükdaksütsü nükjidong nung Chuchuyimpang Baptist Arogo Christian Education Ministry kübok June 27 nungi June 30 tashi Vacation Bible School "Stellar Shine Jesus Light" ta asüba omen dak ajemdaker agiogo.

Iba VBS nung tanur ajak agi 374 kanga dang temoatsü ngua denogoi aser ibaji Child Co-ordinator ABAM Wt.Abenla Aier lenisüba nung agi aser kasa sentong nungsa kenten lenir Wb.Chubaonen ajanga VBS Ken aser tanela ken ajanga temoatsü nguogo, ta Wt. S.Aienla Sempo

Chuchuyimpang Baptist Arogo nung Asso.Pastor Christian Education-i sangdong ka ajanga lemsatop. Iba VBS takok ngua agitetsüsa tesayur aser teyariteper aser Arogo nung sannükeri anir tongtipur ajaki nungita yariba asoshi Wt.S.Aienla-isa lemsatop.

Japan nung Arogoi tetsür missionary tem nem tenüngsang agütsü

June 29, 2023: Japanese bishops' conference nung tongti putiri Sisters of the Infant Jesus nungi mezünpur tetsür missionary tem Japan-i arua pastoral mapa aser missionary mapa tajung aika inyakba atema tenüngsang agütsüogo. Tetsür missionary tem Japan-i aruba sülen küm 150 ajungba amongba mapang Japan nung tongti Arogoi tetsür missionary tem nem tenüngsang agütsü.

mission ji talisa sensakertem aser teküboktiba jenjang nung alirtem nem shisaliok agütsütsü aser anepalutsü atema lir. Facebook post ka ajanga Kikuchi-i, "Japan dangi yokba missionary mezüngbubaji tebur-Francis Xavier liasü aser tetsür rongnungi mezüngbuba missionaryji Sisters of Infant Jesus nungi liasü," ta metetdaksü. Spain nunger Francis Xavier-i Society of Jesus tenzük aser Japan linük mezüng semdangba misionary jibo pa liasü. Iba sülen tetsürtem nungi Japan, Yokohama mezüng semdangba tetsür missionary ji Mathilde Raclot liasü.

mezüng iba linük libaliru den külemi kasa lisemtsü atema parnokki mapang agia liasü, iba sülenbo süngjang tajung atang, ta metetdaksü. "Iba süngjangji Nicolas Barré-i prok. Lai mezünpur nun tem ner Japan limai anir arua liasü," ta Sister Flourez-isa metetdaksü. "Iba maparenji temela masü liasü saka süngdongji tain aküm. Iba mapang nungjagi tenzuka küm 150 tashi süngjang tajung atangba manener," ta laisa shisem. Asia nung tetsür missionary tem rongnung kanga nüngtuguji Sister Raclot liasü. Lai Asia tesem balala nung shisaliok ajungkettsütsü atema inyak. Lai Malaya, Singapore aser Japan linüktem nung convent school aika lapoktsü.

Taoba hopta Tokyo nung aliba St. Ignatius Arogo nung tenüngsang agütsüba sentong nung jembidang Kikuchi-i tetsür missionary mezünpurtem nem tenüngsang agütsü. Iba sentong nungji Infant Jesus Sisters nung Superior General, Brigitte Flourez den nun tem, sorkar ketdangsertem aser Arogo lenirtem aika aden. Iba sentong nung Inaba Gakuen School nungi kaketshir choir-i ken tena liasü. Sisters of Infant Jesus ya 1666 küm France yimtiba, Paris nung Nicholas Barré-i tenzuka liasü. Sisters of Innfant Jesus

ki malirtem atema shelter home ka amenoka liasü. Shelter home nungji kanga sensaker tetsürtem aser tanurtem anepalua yari. Iba dak alia nun temi tetsür ajak nem shisaliok agütsü. La den missionary nun tem Japan-i aruba sülen mapang tatsüka dang lirbo 1873 küm Japan nung Khristan yimsü tenokdangba agiena liasü. Iba sentong nung jembidang Flourez-i, 1873 küm Japan nung mission mapa tenzükdang

Tokyo aser Yokohama na nung aliba sisters convent nungji tanur 700 shi ali. Sister Raclot-isa s e n s a k e r t e m , shirangertem aser menoknok den yipru lendong tulu agi kongshirtem atema ki tuluka süja liasü. Sister Raclot-i anibelem jenti arema küm 50 dak tali mission superior inyak aser la arrshi küm 96 lia 1911 küm January 20 nü asü. La tasü mangji Japan kübok Yokohama nung arem.

ANOGO ABEN TSÜNGREM DEN

NENOKI TAMATOK

"Tanü ni ne nem agütsüba, Pai melaba, o bendangba, aser Pa ozüng mebenshiba agi Kibuba ne Tsüngrem mamatsü kümdangang." -Tazüngkünem 8:11

Nisung aika dak tashimait ka alibaji 'amatokba'. Iba ya kanga dang lendong tulu. Tsüngremi asenok dang inyakba, Tsüngrem O, aseni Pa dang nangzükba itemji amara kanga takoksa tulu asütsü. Mosai Israel nunger dang tenangzükba lima nung liyonga aodang ozüng benshia Tsüngrem mamatoki alitsü tekümdangtsü tulu agütsü. Tazüngkünem 4-8 nungji 'nenoki tamatok' ta aiben shia angur. Israel nungerji Tsüngremi shimtetba, parnok meshiteta aliba agia masü, saka Tsüngrem temeim agi aser Pai par tsürabur dang nangzuka aliba ataloka inyak. Tsüngrem meimertem Pai putu jenti moatsütsü, item ajak ya Israel nungertem mamatoki Tsüngrem teti meteta alitsü Mosai parnok dang ashi.

Tenangzükba limaji temo lima, ninang mojitsü aser mamatsü ayimba lima. Saka iba jagi teperi masü, Tsüngrem parnok den dena alinungang, taküm angutsü. Tenangzükba lima nungji mapang melenshia aotsü, saka Tsüngrem o memelenshitsü, parnok nem agütsüba ozüng nung kecha metenloktsü mesüra meintoktsü indang ashi. Ano azükarua aodang Tsüngrem mamatoki Pa nem tenüngsang agütsütsü, parnok sasa inyakteter masü Tsüngremi tashi agütsüba agi inyakteter ta Pa mamatoktsü tekümdangtsü agütsü.

SARASADEM:

Teyanglur Tsüngrem! Kodanga Na mamatoktsü, Nai mulungha nung teti jajatsü, kü dang aochiang ta Yisu Tenüng nung mepishir, Ne mulung süang. Amen.

World Council of Churches tentetba sülen küm 75 jungogo



1948 küm World Council of Churches (WCC) tentetba sülen taküm küm 75 ajungba nüngtem nung June 25, 2023 nü Geneva nung aliba St. Pierre Tenla kidang sentong agidang tangokba noksa nung angur.

July 01, 2023: 1948 küm World Council of Churches (WCC) tentetba sülen taküm küm 75 ajungba nüngtem nung June 25, 2023 nü central Geneva nung aliba St. Pierre Tenla kidang sentong tajung ka ayongzuka agiogo. Europe nung World War II ajanga teraksatsüba tulu aliba sülen tanaben asüngsashiba mapang nung 1948 küm WCC ya tenteta liasü aser mezüngbuba WCC sendenji 1948 küm August 22 nungi tenzuka September 4 tashi Amsterdam nung ayongzuka agi. Iba senden nungji Arogo 147 nungi tejaoker 351 aden. WCC tentetba mapang nung tongtibangtiba nükjidongji yimjung atema inyaksü aser taitoktep atema inyaksü liasü. WCC küm 75 ajungba anogomong sentong nung

jembidang WCC central committee nung moderator, Heinrich Bedford-Strohm-i, "Alima nung Arogotem longiemer lenitsü aser yimjung yanglurtem asütsü mangdang tejangja yur 1948 küm lenirtem Amsterdam nung longjema liasü," ta ashi. Paise, "Parnokisa, rara ya Tsüngremi melungba anema lir ta sangdonga liasü. Kin aser nüburtem tsüngda telemsa ajanga rara tulu adoka nisung million aika takoksa angu, anungji item amaji koktettsü atema inyaksüji Khristan shilem lir," ta pai ashi. WCC küm 75 ajungba nüngtem nungsa taoba mapang WCC deputy general secretary, Georges Lemopoulos aser Greek Orthodox Patriarchate, Antioch nungi Maria Yaziji nati cake ka arang.

**AO OSHI ANGAZÜKDAK:
TANÜ ANGAZÜKTSÜBA OJANG**



Remok

(v) tashidak wara agi aika asü (massive death from epidemic)

* Ansüra wara aru shia an ajak **remoka** asür.

Remra

(n) temoatsü (good fortune)

* Moaba aolen ajak nung kanga **remrar**.

OLONG PAITEP # 6563

	1	2		3		4		5
6							7	
				8		9		
		10						
11								
			12					
13	14	15						16
17							18	

TIPIEN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S _ _ _ _ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. _ _ _ hi - (3)
- 16. Akümüli nungi pilar - (3)

OLONG PAITEP # 6562 TELANGZÜBA

TIPIEN :

- 1. Meyi, 6. Shin, 7. Yimkong,
- 9. Tera, 11. Teberem, 12. Anem,
- 15. Senmang, 17. Tenü, 18. Anep.

LANGTSÜNGLEN :

- 2. Yim, 3. Tanü, 4. Shilem, 5. Ano,
- 7. Yakta, 8. Kilem, 9. Tenem,
- 10. Amang, 11. Tenüng,
- 13. Mela, 14. Ita, 16. Ain.



2023 JUNE ITA LILI RESULT !

June ita nung Lili tajungtiba (First) shimteta tanü yangi lephsia agütsür. Lili zülur-i July 10, 2023 tashi nung Tir Yimyim Office nungi senpet agizüksü mepishia metetdaksür.

WARAKLAI AINLEN NUNGI TAMBU DEN TEMOLUNG MALEM JEMBIR :

- Warakla** : Tambu na kidang südi? Süra grinder ji khen start hangjong.
(Krrrrr krrrrr krrrrr), good.
(Next day)
- Warakla** : Tambu tanüa grinder ji khen start hangjong.
(Krrrrr krrrrr krrrrr), good.
Tasemnepjia kasaji inyaker Warakla kidangi ajungben shilanger.
- Warakla** : Talak, nebu kong lir?
- Polokba** : Oja, obalaji anogo asemnü buba kidangi meshilangi grinder machine to apur senzüdar kodi!
- Warakla** : Mekümteta!

- Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NBSE-i World Wildlife Fund indang metetdaksü

Dimapur, Chiteni/July 1 (TYO): Nagaland Board of School Education-i sangdong ka ajanga, World Wildlife Fund (WWF)-India-i tawa Wild Wisdom Global Challenge Edition 16buba amenokogo aser iba sentong atema omenji 'Birds of the World' lir, ta metetdaksü.

Iba tetoktepa ya class 6 nungi 9 tsüingda alirtem atema lir aser school züingoksemtü atema angati asütsü.

Wild Wisdom Global Challenge 2023 ajanga alima nung aliba kaketshirtem ajak jaoker, koba pei atsü aser tesem balala nung ozütem kanga junga reprangtsü atema lir.

Anungji NBSE-i school tem dang iba osng kaketshir ajak nem metetdaksütsü aser parnok <http://academy.wwfindia.org/wildwisdom/> ajanga züingoksema "WWF Wild Wisdom Global Challenge 2023" nung shilem agitsü atema ajungmesotsü ayongzükogo.

Livingstone Foundation International College

Thahekhau/ Kevijau, 797112- Dimapur, Nagaland



Admissions Open for Session 2023-24

MAJOR COURSES OFFERED

- ❖ BA English
- ❖ BA Political Science
- ❖ BA History
- ❖ BA Psychology
- ❖ BA Education
- ❖ Bachelor of COMMERCE

Skill enhancement courses and value based courses as per NEP 2020

OTHER CERTIFICATE COURSES:

- ❖ Hospitality
- ❖ Art and Crafts
- ❖ Music
- ❖ Culinary skills
- ❖ Driving lessons
- ❖ NCC

COME FIND YOUR PATH IN THE JOURNEY WITH US!

- Workshops and skill training
- Career Counselling
- Exciting Clubs
- Exposure trip
- Community service
- Special scholarships and concessions:
 - ☑ 100% concession in the 1st semester (top 20 from NBSE or 90% above from CBSE and others)
 - ☑ 50% off 1st semester fees for students excelling in sports, arts, music and more.
 - ☑ 50% off 1st semester fees for LFIS students.

OFFLINE ADMISSIONS: 9: 00 AM - 2: 00 Pm
(Forms available at the LFI accounts section)

College admission fees: Rs. 5000/- (Both Arts and Commerce)

CONTACT US :

+91 8730830096/ +919436012716 / 03862 244302

livingstone.nagaland@gmail.com

website: livingstonenagaland.com

livingstonecollegenagaland

Meghalaya nung human-elephant conflict tesem nung solar lights enok



West Garo Hills district nung Aaranyak züingsemtemi human-elephant conflicts (HEC) tesem nung solar street light enoktsü bener aodang agiba noksa angur.

Guwahati, July 1, 2023

(Agencies): Ammang nung arem shiti aser nisungtem tsüingda lendong ataloker aser iba atema Meghalaya nung solar street lights enokogo.

Human-elephant conflicts (HEC) atalokba tesemtem nung lendong nungi jenbutsü atema iba mapa inyaker.

Iba mapa ya Aaranyak (www.aaranyak.org) ajanga inyaker aser iba telok ya India nung research-driven biodiversity conservation organizations tongtipang ka lir.

Parnoki West Garo Hills district nung HEC areas ta ajiteta aliba yimtsüing 7- Borogobal, Photamati, Kharsengdap, Bondukmali, Darengsigre, Bordubi aser Jamdangre nung

solar street lights 10 enoktsüogoo. Aaranyak indang telok kati arem shiti senzüba indang survey ka agi aser iba sülen solar street lights enoktsü. Yimtsüing 7 nung Garo, Rabha, Bodo aser tanga lisopurtem alir.

"Solar Street lights ya HEC atema kanga tongtipang kechiyong ammang nung tesangwa agütsür aser lendong nungi jenbur" ta Aaranyak nungi senior conservation scientist Dr Bibhuti Prasad Lahkar-i ashi.

"Solar Street lights ajanga lenmang yabanger aser iba ajanga ammang nung nisung aser shiti ajungbena ajurutebpa nungi kümzüker" ta pai ashi.

"Village Champions aikati community awareness nung shilem agir aser yimtsüing jenjang

nung arem shititem den tiptema alitsü atema tesayubatem agütsür. Street light installation maparen nung parnoki tongti shilem agiogo" ta Aaranyak ketdangsür Anjan Baruah-ia ashi.

Meghalaya kübok West Garo Hills district nung HEC ajanga kanga kongshir.

June 28 nü Darwin Initiative ajanga teyari agütsüba den Meghalaya Forest Department aser British Asian Trust den yaritepa solar lights enoka liasü.

Aaranyak nungi Anjan Baruah, Vendo Theodore, Subhas Rabha, Nipul Chakma aser Rupam Gayari nung den street lights indang company nungi technicians-i iba mapa inyaka liasü.

Himanta Sarma dak Jinnah tanela keta lir: Congress MP

Guwahati, July 1, 2023

(Agencies): Sorkari delimitation draft sayaba sülen Assam kübok tesem aika nung nübortemi mepelaba metetdakja arur.

Congress lennirtem Abdul Khaleque, Jakir Hussain Sikdar aser Abdul Rahim Ahmed nungeri anir nisung noklang aikati Barpeta District Commissioner indang office jaldang adenshir delimitation maparen nung temulung

masüba metetdaksüogoo.

"Delimitation draft ya Election Commission ajanga masü saka Himanta Biswa Sarma ajanga yangluba lir. Pakistan tentetsang Muhammad Ali Jinnah-ia iba ashishitep aketba draft mulunga agizüksü ta Sarma-i shiogo" ta Abdul Khaleque-i metetdaksü.

Barpeta Lok Sabha MP Khaleque-isa Assam Chief Minister aser Jinnah na medemdanga jembi.

"Barpeta District nung constituency 6 dang asütsübaji onoki magizüker, taoba mapang mulungtepba ama constituency 8 lemsüktsütsü akhanger" ta Sarukhetri constituency MLA Jakir Hussain Sikdar-i ashi.

"Nisung shingaia delimitation maparen pelaa magizüker. Koch-Rajbongshi nungeri Bongaon nung lungkak aitiba ajanga nisungtemi magizükba sayur" ta Barpeta MLA Abdul Rahman Ahmed-ia ashi.

Nangzükba ama prangbong injang magütsüba agi Ukraine nunger commander tem tezü adanger



Ukraine nunger sepaitem Kyiv temeket nung combat training exercise ka agiba mapang tangokba noksa nung angur. Ukraine nunger ketdangsürtemi ashiba agi, Belarus den arrtsü nung sepaitem tali yoktsü atema parnok sentong lir.

Kyiv, Chiteni/July 1 (Agencies): Fighter jets nungi tenzüker artillery injang agi anüngba ajanga Russia nunger mintoktsü atema sentong yanglur aliba kanga meyilongi küm daksüogo, ta Ukraine military commander-in-chief Valery Zaluzhny-i ashi.

Anüolen aliba linüktemi prangbong aser injang agütsütsü nangzükba kanga meyilongi agütsüba atema ashishia Zaluzhny-i Washington Post den sensaksema mapang ashiba agi, Kyiv nem teyari agütsüba anüolen aliba linüktemi tayimtsü teyari medenibo kecha tesem mamaktsü ta bilemer, saka Ukraine tang tashi nangzükba ama F-16 fighters atadar.

"Ni tayimtsü 120 menügdaker. Ni alima ajunga amokmerentsüba masü. Ishika dang asüyonga teperi," ta pai osang kakat dang ashiba den anüolen aliba linüktemi tayimtsü atema kanga meyilongi tenzüka atema ashishiba agi pa kanga tezü adanger, ta ashi.

"Parnok nüngdaker kechiyong tanga lenmang kecha mali aser tsükchirtemi tayimtsü generation balaka amshir," ta pai ashi.

Paisa, Russia nungeri akhaba artillery injang den medemdangra pa ket nung tera dang lir ta ashi.

Zaluzhny-i ashiba agi, pai Pentagon Joint Chiefs Chairman General Mark Milley amala anüolen aliba partner tem den tanen maka tongtepratepa arudar, shirnoki Ukraine tenügdakba meteta lir.

"Tenangzüktepa ka yangluogo: onoki 24/7 tongtepratepdar. Anungji ni parnok dangi call süa kü nem hopta ka nung injang 100,000 magütsüra nisung 1,000 asütsü ta shitettsü. Kü tia bilemdangang," ta pai Washington Post dang ashi.

Ajisüaka Milley kisüngi telemteba magitetsü aser koda menodir yamaji lendong tuluba akümer, ta Zaluzhny-i ashi.

"Telemteba agiba mapang anogoshia nisung aika taküm samadar, kechiyong tang tashi telemteba magi lir," ta pai ashi.

"Iba ya jilushi ka masü. Iba ya alima ajungai reprangba jilushi ka masü. Anogoshi meter ajakji azü agi alanzükür," ta pai ashi.

Washington, DC nung amendaker aliba think tank; Institute for the Study of War (ISW)-i Hokolbarnü ashiba agi, Russia den rara nung military hadir tem akoksaba indang telangzüba agütsüba mapang, Ukraine-i parnok indang tank aser armoured garitem ajak rara nung amshioago aser "parades" atema kecha anüngzüka mayu, ta Zaluzhny-i telangzüba agütsüogo.

Hokolbarnü menor Washington nung o jembiba mapang Milley-i, United States aser parnok den sendaktepa aliba linüktemi Ukraine nem supply agütsütsü atema kanga meranga inyaktepdar, ta ashi.

"Mimchir-i akokba tashibo onoki parnok nem teyari agütsüdar," ta pai ashi.

Milley-isa, Ukraine nem F-16s aser ATACMS, precision

missiles agütsütsü atema US maneni sensaksemdar, ta ashi. Paisa, nisung kari, Russia nunger anema kanga meyilongi jenjang agiba atema ashishioago, ta ashi.

Milley-i Washington nung National Press Club nung adenshia aliba lokti dang, Ukraine nungertemi tanem tanemi Russia nunger anema jenjang agidar aser minefields tem ajanga anogoshia meter 500, meter 1000, meter 2000 ta tejakdangi aotsü merangdar, ta ashi.

Paisa, nübürtem kar aser computer temi takzüba dang nungi inyakyim meyilongiba aoba agi pa mesümganger, ta ashi.

"Paper nung aser shitakba rara ya khenyongi balala. Shitakba rara nung shitakba nisung asür. Shitakba nisüngtem yakbang nung lir aser item garitem nung shitakba nisungtem mena lir. Shitakba nisung temangtem bomb tem agi poksatsür," ta pai ashi.

Hokolbarnü Ukraine tir Volodymyr Zelenskyy-i ashiba agi, Ukraine nunger sepaitem tesem ajaklen tejakdangi odar. Paisa, Belarus den linük arrtsü nung security akangshitsü atema tetuyuba agütsüogo, kong Russian mercenary telok Wagner nungi sepaitem jenoka lir.

Zelenskyy-i ashiba agi, Ukrainian intelligence service GUR, foreign intelligence services aser border guard temi Belarus nung tensa indang pa nem osang agütsüogo.

Office of the CHUNGTIA MEDEMCHANGER PUTU MENDEN Mokokchung, Nagaland 798601 **SANGDONGER**

Chungtia Medemchanger Putu 30th June, 2023 nü meeting agia yamai lemtet.

Mr. T. Chalukumba-i Chungtia anema sobaliba nung aibelenba atema tanü Dated 30th June, 2023 pa Chungtia senso nungi arishi tepiyong jendoker. Chungtia yimtsüng nung pa shir kidang anenzükdir Chungtia Medemchanger Putu-i par ki atangtsü ta sangdonger.

Medemchanger Putu nung kidong ter pezü signatories:

- | | |
|------------------|-----------------|
| 1. B.Kilang | 8. Chubasangba |
| 2. B.Wati | 9. T.Bendang |
| 3. Chubatoshi | 10. Moatemen |
| 4. Narokaba | 11. U.Yanger |
| 5. T.Bursangba | 12. Supongtsuba |
| 6. I.Wati | 13. Purlemba |
| 7. Bendangmayang | 14. Punarepba |

Longkak aiter azüoktsü atema France sorkari police 45,000 yokogo

Paris, Chiteni/July 1 (Agencies): Mongolbarnü arishi küm 17 tain asagur chanu ka police ketdangsür kati khasetba sülen France nung anogo pezü tashi longkak aitertemi yimti balala anokshitsüogo aser iba ya azüoktsü atema France sorkari Honibarnü police officers 45,000 den armoured vehicles kar yokogo.

Longkak aitertemi, yimti balala nung ki aser garitem rongtoktsüba den dokan balala rakpoka ia rakzükkrademba ajangshioago.

France ajunga nung tang tensa mejungi lir, kong Marseille, Lyon, Toulouse, Strasbourg, Lille aser Paris yimti densema lir. Mongolbarnü Paris kübok Nanterre suburb nung Algeria aser Morocco nungi jakzükba arishi küm 17 tain Nahel M khasetba sülen iba mepetmesü ya tenzüka liasü.

Pa tepsetba video ka prangkha aoba ajanga mapang talangka nungi sensaker aser temeyoktep kintemi parnok anema police temi jenjang tesashi agiba aser racism dak sendakba nung ashishia aruba jangrushidaktsü.

Interior Minister Gerald Darmanin-i Honibarnü ashiba agi, Hokolbar aonung nisung 270 apuba sülen tang tashi nung nisung 1311 pua lir. Hokolbar aonung apurtem rongnungi Marseille yimti nungi nisung 80 densema liasü, kong North Africa nungi jakzükertem aika lir.

Social media nung noksa balala ajanga Marseille kübok port tejenba tesem nung langka apokba sayuogo. Yimti ketdangsürtemi ashiba agi, parnoki iba ken o bushisüngdangdar, saka iba lendong nung nisung asüba osangbo kecha mangazüki lir.

Marseille nung longkak aitertemi prangbong ayokba dokan ka rakpoka tur prangbong kar auya saka injangbo mauya ta police-i ashi. Iba dokan ya tangbo police temi nüka lir.

Marseille Mayor Benoit Payan-i, sorkar dang sepa talila yoktsü atema mepeshia metetdaksüogo.

Kasa mapang nung iba yimti nung Honibarnü police ketdangsür asem yiruogo.

Lyon yimti nung gendarmes police force-i tensa azüoktsü atema armoured personnel carrier tem aser helicopter ka yoka liasü.

Darmanin-i France ajunga nung local ketdangsürtemi dang aonung 9:00 ako nungi tenzüka bus aser tram service shibanga atatsü metetdaksüogo aser ashiba agi, ketdangsür 45,000 yokogo, koba Brestbarnü dang nungi 5,000 agi timba lir.

TF1 indang nikongtsütsü television news sentong nung sorkari state of emergency benoktsü asü ta asüngdangba mapang Darmanin-i, "state of emergency benoktsü akok aser taonung sülen tir-i kechi jenjang agidir aji repranga atati," ta ashi.

Paris nung police temi Hokolbar aonung central Place de la Concorde square nungi longkak aitertem anina liasü.

Iba mepetmesü tenzüka sülen police 200 dak tema yiruogo aser longkak aiter noklang aika puogo, ta Darmanin-i ashiba den police-i pua alirtem ya timba arishi küm 17 tain tanurtem lir.


Iba mepetmesü tenzüka mapang Macron-i tsürapurtem dang pei chirnurtem yimtongi meyoktsü atema mepeshia liasü.

Mepetmesü tenzüka sülen longkak aitertemi dokang aika rakpoka tua rakzükkrademogo aser gari 2000 shi rongtoktsüogo.



Paris: France Interior Minister Gerald Darmanin-i Hokolbarnü ashiba agi, aonung longkak aitertem azüoktsü atema sorkari police 45,000 yokogo. Nanterre nung police ketdangsür kati arishi küm 17 tain Nahel M tepsetba sülen France kübok yimti balala nung nübürtemi longkak ait tenzükogo aser tang tashi nung nisung 1300 dak tema pua lir.

Neeraj Chopra-i tanabuba Diamond League kokogo



Neeraj Chopra

Chiteni/July 1, 2023 (Agencies): India nunger nungtugu javelin thrower Neeraj Chopra-i otsü tasen ka yanglua Hokolbarnü Diamond League title tanabuba benogo.

Lausanne nung Chopra-i asaya kanga junrarabo metenzük kechiyong pai nület mezüngbuba atsüba mapang foul mena aser ibayongji Germany nunger Julian Weber (86.20m) tejakdang aküm. Ajisüaka India nunger asayar

yagi meyipa arur nület tanabuba atsüba mapang 83.52m atsü aser tasembuba nung 85.04m tsüteta liasü.

Nület atsübashia Chopra-i tajungba tsüyonga atu ajisüaka pezübuba nunga pai foul mena liasü. Arishi küm 25 tain asayar yagi nület pongubenbuba atsüba mapang 87.66m tsüteta taküm Diamond League title tanabuba bena liasü. Iba küm tetenzüklen Chopra-i Doha nung nület 88.67m tsüteta gold medal angu

aser otsü tasen ka yanglua liasü. Iba asayamung nung Chopra-i kanga junga shilem agiogo, kechiyong pa yiruba ajanga ita kashi masayai lir tang mezüngbuba iba asayamung nung shilem agia liasü.

Tokyo Olympics nung goal medal ngur aliba asayar yagi taoba ita Twitter ajanga pa training agiba mapang tetsü yiruba metetdaksü aser kümdangshia alitsü atema Netherlands (June 4) nung FBK Games aser Finland (June 13) nung Paavo Nurmi asayamung nung shilem magitsü ta sangdonga liasü.

Kasa mapang nung arishi küm 25 tain asayar ya tawa tembangba National Inter-State Senior Athletics Championships, Bhubaneswar nunga masayai liasü.

Lausanne nung tebur javelin throw nung gold anguba sülen pa July 21 aser August 31 nü Monaco aser Zurich leg nunga asayatsü aser iba sülen September 16 aser 17 nü Eugene, USA nung Diamond League grand finale nung shilem agitsü.

Inter Milan-i France nunger forward Marcus Thuram alizükogo



Marcus Thuram

Chiteni/July 1, 2023 (Agencies): Inter Milan-i France nunger forward Marcus Thuram, Bundesliga club Borussia Monchengladbach nungi alizükogo, ta Serie A club yagi Honibarnü sangdong ka ajanga metetdaksü.

France nunger taoba mapang World Cup koker aliba asayar Lilian Thuram'er jabaso arishi küm 25 tain Marcus ya Inter Milan nungi küm pongu asayatsü atema tenangzüktepba ka yangluogo, ta media sangdong balala ajanga metetdaksü. Pa Gladbach nungi 134 ben asayaogo aser iba mapang pai goal 44 idaksü aser assist 29 süja liasü.

France team nungi 2020 küm mezüngbuba asayaba sülen Thuram-i tang tashi nung linük team nungi 10ben asayar lir. Pa taoba küma World Cup

nunga asayaogo, kong France team tanabuba jenjang nung tembanga liasü.

"Marcus Thuram ya kanga tekara lir. Pai pa nükjiong kanga kara tongtetogo aser pai lenmang nung tetsükdaksü aika ajangtetogo," ta Inter-i kasa sangdong ajanga metetdaksü.

Thuram, shiba tebu Parma nungi asayaba mapang iba yimti nung soa liasü, pa Inter den tenangzüktepba meyanglu tsüngda Europe nung club aika den sendaktepa liasü.

Inter, shirnok taoba ita Champions League final nung Manchester City-i tsükdakja liasü, parnoki Skrinjar, Danilo D'Ambrosio aser Roberto Gagliardini nunger tenangzüktepba yanglur aliba tembangba sülen club toktsüba sangdongogo.

ODI WC: Pakistan-i India nung asayatsü aliba tesemtem semdangtsü



Chiteni/July 1, 2023 (Agencies): Taruba ICC ODI World Cup atema linük team nem temelaba magütsü tsüngda Pakistan-i India nung team asayatsü aliba tesemtem asadangtsü atema security delegation ka yoktsü sentong lir, ta Inter-Provincial Coordination (Sports) Ministry nungi official source kati metetdaksü.

Eid tembanga Pakistan Cricket Board mendenbuba tasen ka shimba aser foreign and interior ministries den ken o ashishitepba sülen security team-i India kodang semdangtsü aji sorkari telemtetba agitsü.

"Pakistan team asayatsü aliba tesemtem aser World Cup mapang team asoshi security aser tanga tenüngdakbatem koma renemja lir aji asadangtsü atema PCB ketdangsurtem den security team India-i aotsü," ta pai ashi.

Pakistan nunger ketdangsurtem yagi Chennai,

Bengaluru, Hyderabad, Kolkata aser Ahmedabad nung World Cup asayatsü aliba tesemtem semdangtsü imlar.

World Cup nung India aser Pakistan na October 15 nü Ahmedabad kübok Narendra Modi Stadium nung asayatsü lir.

"India semdangtsü aliba shia cricket board-i sorkar dang nungi temelaba meshir aser sorkari ken o balala asadangtsü atema India-i team ka yoker," ta ketdangsurtem yagi ashi.

"Ketdangsurtemi India nung lenirtem den sensak asemtsü aser parnok den külemi onok asayartem, ketdangsurtem, fan tem aser media atema security aser tanga tenüngdakbatem koma renemja ali aji asadangtsü," ta pai ashi.

Paisa, ketdangsurtemi Pakistan team asayatsü atema lemzüka aliba tesem nung masü saka tanga tesem kar nung asaya tajungba asütsü ta bilemra parnoki report nung

shisemtsü, ta ashi. "Tashishiba kar danga lira PCB-i iba report ya ICC aser BCCI den lemsateptsü," ta pai shisem.

PCB nungi source kati ashiba agi, taoba mapang T20 World Cup atema Pakistan team India-i aoba mapang sorkari team asayatsü aliba tesemtem asadangtsü asoshi team ka yoka liasü.

"Ketdangsurtemi osang agütsüba sülen India aser Pakistan na Dharamsala nung asayatsü aliba Kolkata-i belena liasü," ta pai ashi.

Source-isa, sorkari PCB nem temelaba agütsüba sülenang Pakistan team World Cup nung shilem agitsü magitsü iba indang osang agütsütsü, ta ashi.

ODI World Cup ya taküm India kübok yimti 10 nung October 5 nü nungi tenzüka asayatsü aser final November 19 nü asayatsü.

Elorda Cup 2023: India team-i medal pongu angu



Chiteni/July 1, 2023 (Agencies): Elorda Cup boxing tournament nung Honibarnü Vijay Kumar, Sushma, Keisham Sanjit Singh, Neema aser Sumit nungeri pei tata asaya nung bronze medal kaka anguba sülen India team-i medal pongu nguogo.

Tebur 60kg category asaya nung Vijay Kumar-i kanga meranga asayaka pai Kazakhstan nunger asayar Beknur Ozhanov 1-4 agi mekoki bronze medal dang angu.

81kg category nung Sushma-i Kazakhstan nunger 2023 World Championships bronze medallist Fariza Sholtay kanga tasü ita asaya ajisüaka 0-5 agi tamakok angu aser bronze medal dang ngur iba asayamung tembanga liasü.

Iba asayamung nung medal anguba India nunger asayartem rongnung Keisham (48kg), Neema (63kg) aser Sumit (86kg) nunger densema lir.

Asayamung nung bronze medal angurtem nem senpet USD 200 agütsütsü.

BILEMDANGANG
"Temoatsütem züngdanga lira tenüngsang agütsütsü menongangtsü."